



Datë: 07.07.2025

Numër Protokolli: 4548/2025

A.nr.895/2025

Këshilli i Pavarur Mbikëqyrës për Shërbimin Civil të Kosovës – Kolegji për Shqyrtimin dhe Vendosjen e Ankesave, në përbërje nga: Malsore Gashi-Bajraktari, kryetare, Eshref Shabani dhe Ardita Haxhnikaj-Demi, anëtarë, me Atdhe Gashi, në cilësinë e procesmbajtësit, ka shqyrtuar ankesën me numër A.nr.895/2025, të datës 15.05.2025, të parashtruar nga ankuesi A.R, kundër organit të punësimit: Komuna e Prishtinës, në çështjen juridike “*Kërkesë nga marrëdhënia e punës*”, duke vepruar në pajtim me nenin 6 paragrafin 1 nën paragrafin 1.1, nenin 16 paragrafi 3 dhe nenin 18 paragrafin 1 nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, i ndryshuar dhe plotësuar me Ligjin Nr.08/L-180 si dhe në mbështetje me dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur me datë 07.07.2025, mori këtë:

V E N D I M

I. Aprovohet si e bazuar ankesa A.nr.895/2025 e datës 15.05.2025, **ashtu që detyrohet** Menaxheri i Personelit në Komunën e Prishtinës, që brenda afatit prej 15 ditësh nga dita e pranimi të këtij vendimi të shqyrtoj Kërkesën e datës 18.03.2025, të parashtruar nga Drejtoresha e Drejtorisë së Parqeve në Komunën e Prishtinës, dhe të nxjerr akt administrativ në pajtueshmëri me dispozitat ligjore në fuqi.

II. Këshilli i Pavarur Mbikëqyrës për Shërbimin Civil të Kosovës, duhet të njoftohet me shkrim pas ndërmarrjes së veprimeve në pajtim me këtë vendim.

A r s y e t i m

Nëpunësi civil, A.R (në tekstin e mëtejme referuar: Ankuesi), më datë 15.05.2025 ka parashtruar ankesë me numër protokolli 3181/2025, në Këshillin e Pavarur Mbikëqyrës për Shërbimin Civil të Kosovës, për shkak të heshtjes administrative të Burimeve Njerëzore në Komunën e Prishtinës, në raport me kërkesën e datës 18.03.2025, të Drejtoreshës së Drejtorisë së Parqeve në Komunën e Prishtinës.

Këshilli i Pavarur Mbikëqyrës për Shërbimin Civil të Kosovës (në tekstin e mëtejme referuar: Këshilli) bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave, më datë 27.05.2025, ka proceduar kërkesën për përgjigje në ankesë tek Komuna e Prishtinës, ndërsa kjo e fundit më datë 30.05.2025 ka përcjell shkresat e lëndës lidhur me çështjen përkatëse ankimore.

Kolegji për Shqyrtimin dhe Vendosjen e Ankesave (*në tekstin e mëtejshëm referuar: Kolegji i Këshillit*), pasi ka shqyrtuar të gjitha shkresat e lëndës, ka konstatuar se meqenëse nuk është nxjerr akt administrativ lidhur me kërkesën e Drejtoreshës së Drejtorisë së Parqeve në Komunën e Prishtinës, atëherë ekziston baza ligjore që të detyrohet Menaxheri i Personelit në Komunën e Prishtinës, të nxjerr akti administrativ në pajtim me legjislacionin në fuqi lidhur me shqyrtimin e kërkesës së datës 18.03.2025, **sepse:** Nga administrimi i provave të lëndës rezulton se ankuesi sipas Akt emërimit me Nr.01-112-1209 të datës 25.11.2024, është i punësuar në pozitën e punës *Zyrtar për Financa* në Drejtorinë e Parqeve të Komunës së Prishtinës.

Si rrjedhojë, Kolegji i Këshillit, nga administrimi i shkresave të lëndës ka gjetur se Drejtoresha e Drejtorisë së Parqeve në Komunën e Prishtinës, më datë 18.03.2025 ka parashtruar kërkesë tek Njësia e Burimeve Njerëzore e organit përkatës të punësimit, lidhur me avancimin/transferimin e ankuesit në pozitën e Zyrtarit të Lartë për Financa pranë kësaj drejtorie, mirëpo nga shkresat e administruara të lëndës dhe thëniet si në ankesë rezulton se i njëjti nuk ka pranuar përgjigje në raport me Kërkesën e datës 18.03.2025.

Kolegji i Këshillit, ndërlidhur me rregullat e veprimeve procedurale të një organi publik, ju referua dispozitave të Ligjit Nr.05/L-031 për Procedurën e Përgjithshme Administrative (*tutje referuar: LPPA*), përkatësisht nenit 10 paragrafi 2 ku përcaktohet se: *2. Organi publik zhvillon procedurën administrative sa me të shpejtë dhe me sa më pak shpenzime, për të dhe për palën, duke mos cenuar çfarë është e nevojshme për një rezultat të ligjshëm e të përshtatshëm të procedurës administrative*, nenit 98 paragrafi 1 dhe 2 ku përcaktohet se: *1. Procedura administrative nisur sipas kërkesës, do të përfundojë sa më shpejt që të jetë e mundur, por jo më vonë se sa afati i përcaktuar me ligj të veçantë për atë lloj procedure. 2. Në rast se ligji i veçantë nuk ka paraparë një afat, siç është paraparë në paragrafin 1 të këtij neni, afati i përgjithshëm i zbatueshëm për përfundimin e procedurës administrative është dyzetepesë (45) ditë nga fillimi i saj*, si dhe nenit 97 paragrafi 1 të këtij ligji, ku përcaktohet se: *1. Një procedurë administrative e nisur sipas kërkesës, përfundon me njoftimin e një akti administrativ apo lidhjen e një kontrate administrative*, dhe si rrjedhojë në kuptim të këtyre dispozitave ligjore si dhe bazuar në shqyrtimin e provave materiale të çështjes, Kolegji i Këshillit konstatoi se organi përkatës i punësimit, në rrethanat e rastit konkret, nuk ka vepruar në pajtueshmëri me dispozitat përkatëse ligjore, në raport me Kërkesën e datës 18.03.2025, të parashtruar nga Drejtoresha e Drejtorisë së Parqeve në Komunën e Prishtinës, lidhur me avancimin/transferimin e ankuesit në pozitën e Zyrtarit të Lartë për Financa, ngase sipas bazës ligjore si me sipër, vullneti i organit publik në realizimin e autoritetit publik formësohet në procedurë administrative dhe manifestohet në formën e njërit prej veprimeve administrative, siç janë: akti administrativ; kontrata administrative apo akti real, dhe se në vlerësimin e Kolegjit, organi përkatës i punësimit, në kuadër të autorizimeve të përcaktuara me legjislacionin në fuqi, është dashur që të nxjerr akt administrativ në kuptim të vendosjes dhe të njoftoj palën për aktin e tillë, brenda një afati prej 45 ditësh sikurse përcaktohet me nenin 98 paragrafi 2 apo afatit të vazhduar sipas nenit 99 paragrafi 1 të LPPA-së.

Rrjedhimisht, në vlerësimin e Kolegjit të Këshillit, heshtja e organit të administratës, në këtë rast, Njesisë së Burimeve në Komunën e Prishtinës, në raport me Kërkesën e datës 18.03.2025, cenon të drejtat e ankuesit në kuptimin e të drejtave procedurale dhe për rrjedhojë edhe vendosjes në mënyrë meritore, ngase ashtu sikurse është thënë në arsyetim të këtij vendimi, në kërkesën e parashtruar tek organi i punësimit, Drejtoresha e Drejtorisë së Parqeve në Komunën e Prishtinës, pretendon avancimin/transferimin e ankuesit në pozitën e Zyrtarit të Lartë për Financa, dhe se organi përkatës i punësimit duhet të shqyrtoj kërkesën dhe të vendos lidhur me pretendimet e ngritura.

Kështu që thënë si me sipër e duke u bazuar në nenin 18 paragrafin 1 nën paragrafin 1.4 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji i Këshillit vendosi të aprovoj si të bazuar ankesën e datës 15.05.2025, në kuptim të shkeljeve procedurale, dhe si rrjedhojë detyroj Menaxherin e Personelit në Komunën e Prishtinës, që në respektim të dispozitave procedurale të shqyrtoj Kërkesën e datës 18.03.2025, dhe të nxjerr akt administrativ në përputhshmëri me dispozitat ligjore në fuqi.

Vendimi hyn në fuqi ditën e nënshkrimit nga Kryetarja e Kolegjit.

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm, mund të iniciojë konflikt administrativ në gjykatën kompetente, Gjykatën Themelore në Prishtinë/Departamenti për Çështje Administrative brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda me numër A.nr.895/2025

Atdhe GASHI

Procesmbajtës

Malsore GASHI-BAJRAKTARI

Kryetare e Kolegjit

Vendimi i dorëzohet:

- Ankuesit A.R;
- Menaxherit të Personelit në Komunën e Prishtinës; dhe
- Arkivit të KPMSHCK-së.